



EIBARKO UDALA

2021-2023 aldirako Diru-laguntzei buruzko Plan Estrategikoa

ATARIKOA

Diru-laguntzen Lege Orokorrek beste pauso bat gehiago ematen du sistema ekonomikoa perfektionatzeko eta arrazionalizatzeko prozesuan. Legea sustraitzen duen printzipioetako bat gardentasunarena da eta horrek, legean hezuramaitzen diren beste baliabide askorekin batera, diru-laguntzetarako gastu publikoaren kudeaketaren eraginkortasun eta efizientzia mailaren igoera dakar zuzenean.

Oinarrizko izaera du azaroaren 17ko 38/2003 Legearen 8.1. artikulua, beraz, diru-laguntzak eman nahi dituzten udal guztiek, diru-laguntzak eman aurretik eta hainbat urtetarako, nor bere Diru-laguntzetarako Plan Estrategikoa onartu behar dute.

Era berean, uztailaren 21eko 887/2006 Errege Dekretuak — 38/2003 Legearen Araudia onartzen duena—, ezartzen du diru-laguntzen plan estrategikoak politika publikoak planifikatzeko tresna direla, eta erabilera publiko edo interes sozialeko jarduera bat sustatzea dutela helburu. Halaber, arautu egin dut zer eduki izan behar duten Diru-laguntzen Plan Estrategikoak.

Horregatik, Eibarko Udalak Diru-laguntzen Plan Estrategiko hau onartzen du, Udalak ematen dituen diru-laguntzak arautuko dituen helburu estrategikoak, arauak eta printzipio orokorrak ezartzeko plana, eta baita haren justifikazioa eta kontrola ere.

I. KAPITULUA. DIRU-LAGUNTZEN PLAN ESTRATEGIKOAREN XEDAPEN NAGUSIAK

1. artikulua. Udal honek 2021-2023 aldirako xedatuko dituen diru-laguntza guztiak lotuta geratuko dira honako Plan honekin eta Eibarko Udalaren Diru-laguntzen Ordenantza Orokorrean aurreikusitakoarekin.

Nolanahi ere, jarraipen-txostenak kontuan hartuta eta aurrekontu-erabilgarritasunaren arabera, plan honetako diru-laguntzen lerroak eguneratu edo aldatu ahalko dira urtero; hala ere, aldaketa horrek ez dio eragingo planaren osagaien funtsezko edukuari.

2. artikulua. Plan honetan aurreikusitako diru-laguntzak benetan xedatzeak eskatzen duena da urte bakoitzeko udal Aurrekontuetan diru-laguntza horiei dagozkien diru-izendapenak egitea eta diru-laguntzok emateko oinarri arautzaileak onartzea edo zuzenean ematea adostea.

Era berean, aurrekontu-egonkortasunaren helburuak betetzearen menpe dago diru-laguntzak xedatzea, beraz, aurrekontuetan onar daitezkeen diru-izendapenak eta diru-laguntzok emateko oinarri arautzaileak ere, helburu horietara egokituko dira une bakoitzean.

3. artikulua. Plan honek hiru urteko indarraldia du, alegia, 2021-2023 aldirako balio du, uztailaren 21eko 887/2006 Errege Dekretuaren 11.4. artikulua ezarritakoaren arabera —Diru-laguntzen 38/2003 Lege Orokorren Araudia onartzen duena—. Indarraldian sartuko da horretarako eskumena duen organoak onartu ondoren, alegia, Udalbatzarrak onartu ondoren.

2023a amaituta, Diru-laguntzen Plan Estrategiko berririk onartu ez balitz, oraingo hau luzatuko da egingo diren jarduketetan, betiere horretarako diru-izendapen nahikoa eta behar adinakoa badago.

4. artikulua. Tokiko Gobernu Batzarra izango da, diru-laguntzak emateko udal Ordenantza arautzailearen arabera, Diru-laguntzen Plan Estrategikoa egikaritzeko eginkizuna duen organoa, hau da, laguntzak edo diru-laguntzak emateko eskuduna.



5. artikulua. Diru-laguntzen Plan Estrategikoa onartzeak ez du esan nahi inongo eskubiderik sortzen denik onuradun izan litezkeen alde; halako moldez, non ezingo duten inongo kalte-ordainik edo konpentsaziorik eskatu Planak dioena gauzatzen ez bada.

6. artikulua. Plan Estrategiko honen printzipio nagusiak hauexek dira:

—Publizitate- eta gardentasun-printzipioa, aldez aurreko deialdiaren bidez, non funts publikoetan objektibotasuna, gardentasuna, publizitatea, lehia eta berdintasuna bermatuko diren, hori guztia baztertu gabe balitekeela zuzeneko diru-laguntza ematea, aplikatu beharreko arauan ezarritakoarekin bat, aldez aurretiko diru-izendapena izan beharko duena.

—Lehia-, gardentasun- eta bazterketa eza-printzipioak, onuradunek bete beharreko baldintzak zehaztean, interes orokorrari erantzuteko xedez.

—Objetibotasun-printzipioa: diru-laguntzak deialdian aldez aurretik ezarritako irizpide objektiboei jarraituz emango dira, onuradun izan litezkeen pertsonen aurretik haien berri izan dezaten bermatzeko.

—Eraginkortasun- eta efizientzia-printzipioak: ezarritako helburuak betetzeko eraginkortasuna eta efizientzia baliabide publikoak izendatzean; diru-izendapen horiek justifikatu egin beharko dira kuantitatiboki eta kualitatiboki.

—Aurrekontu-egonkortasun printzipioa eta gastu-erregelarena: diru-laguntzak ematea egonkortasun eta gastu-erregelaren printzipioetara egokituko da, Aurrekontuen Egonkortasunaren apirilaren 27ko 2/2012 Lege Organikoan aurreikusitakoari jarraituz.

—Kontrol- eta analisi-printzipioak, bermatzeko entitate eskatzaileen helburuak berdintasun-printzipiora eta bazterkeria ezaren printzipiora egokitzen direla diruz lagundutako jardueretan.

II. KAPITULUA.

PLANAREN HELBURU OROKORRAK ETA ESTRATEGIKOAK

7. artikulua. Hauexek dira Planaren helburu orokorrak:

—Azaroaren 17ko 38/2003 Legean jasotako lege-agindua betetzea; 8.1. artikuluan diru-laguntzak eman nahi dituzten udalak behartzen ditu beren Plan Estrategikoa onartzera.

—Zuzenean eragitea eraginkortasun eta efizientzia maila areagotzen diru-laguntzen gastu publikoaren kudeaketan; diru-laguntza egokitu beharreko araudia oro har arautuz eta diru-laguntzen lerroak justifikatuz.

—Herritarrek diru-laguntzen programetara jotzea optimizatzea gardentasuna, lehia eta udal irizpide bateratua erabiltzea bermatuz.

—Diru-laguntzen udal kudeaketa arrazionalizatzea, honako hauek kontuan hartuz: zeharkakotasuna planifikatzerakoan, sistematikotasuna haren prozeduretan eta tresna tekniko aurreratuak haren ebaluazioan.

8. artikulua. Diru-laguntzen Plan Estrategikoak lortu nahi dituen helburu estrategikoak eta ondorio nagusiak honako hauek dira:

—Erraminta bat ematea Udalari, haren eskumenen baitan, guztion intereseko jarduerak eragin eta susta ditzan.

--Udal kudeaketaren esparru desberdinetan herritarren parte-hartzea eragitea, sustatzea eta bultzatzea.

--Gizarte-zaugarritasuneko egoera jakin batzuetan dauden pertsonen gizarteratzea bultzatzea.

—Aukera-berdintasun printzipioa defendatzea.



III. KAPITULUA.

PERTSONA EDO ENTITATE ONURADUNAK ETA DIRU-LAGUNTZAK EMATEKO PROZEDURA

9. artikulua. Udalak, deialdi publikoen bidez edo lankidetzaz hitzarmenak sinatuz, diru-laguntzak emango dizkie pertsonari, elkartei edo entitate pribatuei helburu hauekin: erabilgarritasun publikoko edo gizarte-intereseko ekimenak egin daitezkeen bultzatzea edo toki-eskumenari egotzen zaizkion helburu publikoak lor daitezkeen sustatzea.

10. artikulua. Eibarko Udalaren Plan Estrategiko hau zuzenean aplikatuko zaie Udalak urtero ematen dituen diru-laguntzei.

11. artikulua. Honako hauek geratzen dira Plan honen aplikazio-esparrutik kanpo:

a) Onuradunek alde aurretik eskatu barik ematen diren sari edo beka.

b) Udalbatzako talde politikoei ematen zaizkien diru-laguntzak.

c) Bere oreka ekonomiko-finantzarioari eusteko, mankomunitatei, entitatei, elkartei eta partaidetzako sozietate publikoei kuota kontzeptuan (ohikoak zein ez-ohikoak) Udalak egiten dizkien diru-ekarpenak.

IV. KAPITULUA.

EXEKUZIO-EPEA, AURREIKUSITAKO KOSTUAK ETA DIRU-LAGUNTZEN FINANTZAZIOA

12. artikulua. Oro har, udalaren diru-laguntzek urteko exekuzio-epea (diruz lagundutako jarduketak garatzeko) izango dute eta urte naturala izango da hautatuko den epea justifikazioaren ondorioetarako.

Kasu batzuetan, inguruabarrek komenigarri egiten badute urtebetetik gorako exekuzio-epea ezartzea edo epe hautagarria aldatzea, diru-laguntzen deialdietan jaso beharko dira inguruabar horiek; kasu horietan ere, jarraitu beharko dute urtero betetzen indarraldiko legediak ezartzen dituen baldintzak.

13. artikulua. Plan Estrategiko honek aipagai dituen diru-laguntzak erreferentziako jardunaldi bakoitzaren udal aurrekontuen kargura finantzatzen dira, eta, hortaz, baldintzatuak eta mugatuak egongo dira urteroko aurrekontuan onartzera eta hango diru-izendapenetara.

Kostuak, kasu orotan, Udalaren aurrekontu orokorrean urtero ezartzen den zenbatekora mugatuko dira eta ezingo da diru-laguntzarik eman zehazten den kopurutik gorakorik.

Diru-laguntzen programak baldintzatuta geratuko dira aurrekontu nahikoa eta behar adinakoa egotera. Diru-laguntzak eman aurretik, Eibarko Udaleko aurrekontu-arauetan ezarritakoa kontuan hartuta tramitatu beharko da gastuaren baimena.

V. KAPITULUA.

PLANAREN EDUKIA

14. artikulua. Plan Estrategikoak Diru-laguntzen Lege Orokorraren Araudiaren 12.2. artikuluan jasotako eduki mugatua izango du.

15. artikulua. Plan Estrategiko honetan jasota dauden jarduketa-ildo estrategikoak —Udalaren diru-laguntzen ildoak ere hementxe sartuak daude— dira Planari atxikitako eranskinean adierazten direnak.

VI. KAPITULUA.

DIRUZ LAGUNDUTAKO PROGRAMAK KONTROLATZEA ETA EBALUATZEA



16. artikulua. Diru-laguntza bakoitzaren eraginkortasuna hobeto aztertzeko, diru-laguntzak emateko prozeduran organo instruktore gisa jarduten duten zerbitzuek eskatu egingo diete onuradunei, hala dagokionean, egindako jardueren kopuruaren gaineko txosten arrazoitua, diru-laguntzak zenbat herritarri eragiten dion eta lortutako helburuen justifikazioa.

VII. KAPITULUA.

PLAN ESTRATEGIKOAREN KONTROLA, EBALUAZIOA ETA JARRAIPENA

17. artikulua. Udal kontu-hartzaileak egingo du Plan honen finantza-kontrola, plana indarrean dagoen aldi horretan.